

DECLARACIÓN INSTITUCIONAL DO CONCELLO DE SAN SADURNIÑO

25-N, DÍA INTERNACIONAL DA ERRADICACIÓN DA VIOLENCIA CONTRA A MULLER

Fronte ao negacionismo e a banalización da violencia machista que se está a producir nestes últimos tempos é urxente un compromiso político e orzamentario firme por parte de todas as institucións. Mais aínda cando no que vai de 2023 aumentaron os feminicidios tanto en Galiza como no conxunto do Estado.

Esta situación dáse nun contexto social e político no que avanza os discursos machistas, unha cuestión que non debemos obviar, e que debe facer saltar todas as alertas nas administracións públicas e levar á revisión dos mecanismos previstos para mellorar a prevención e a intervención, así como para concienciar á sociedade das consecuencias do patriarcado e da falsidade dos discursos que cuestionan a súa existencia.

O pasado 13 de outubro o Observatorio de Violencia do Consello Xeral do Poder Xudicial facía públicos os datos máis recentes respecto á violencia contra a muller na estadística xudicial, que nos permiten ver unha parte da súa enorme dimensión ao térense rexistrado no primeiro semestre de 2023 un total de 1707 denuncias. Pola súa banda na Memoria do 2023 (exercicio 2022) da Fiscalía de Galicia recóllense máis de 5000 delitos incoados como violencia de xénero e máis de 1600 contra a liberdade e a indemnidade sexual.

Por outra banda, un dos ámbitos que máis preocupa ás persoas expertas é o do lecer o ocio nocturno e o coñecemento de violacións e agresións sexuais en grupo e por parte de agresores mozos.

Lamentablemente, no verán de 2023 coñecemos agresións sexuais múltiples a través dos medios de comunicación que nos recordan a necesidade de avanzar, como é o caso da violación de dous agresores no Porriño a unha moza no contexto dunhas festas ou a agresión sexual tamén cometida por dous mozos a unha moza nas festas de Monforte en agosto e recentemente vimos de coñecer polos medios de comunicación outra agresión sexual múltiple en Sarria. Aínda que o Parlamento galego acordou, a proposta do BNG, impulsar un Protocolo específico para este ámbito en febreiro de 2023, e a Xunta afirmou que estaría listo antes do verán, continúa sen estar activado.

A violencia machista debe ser unha prioridade política, social e institucional de primeira orde e fronte a efemérides rituais e baleiras de contido, temos unha responsabilidade colectiva á hora

de fixar novos compromisos como adecuar as axudas á escalada de prezos e comprometer máis recursos, así como esixir o cumprimento daquelas cuestións que aínda están sen desenvolver da Lei galega contra a violencia machista, como é atención psicolóxica na atención primaria.

ACORDOS

1. Manifestar o noso rexeitamento e condena contra todos os tipos de violencia machista.
2. Rexeitar os discursos negacionistas e banalizadores da violencia machista, e apoiar as demandas do feminismo galego.
3. Reafirmar o compromiso do Concello de San Sadurniño para desenvolver políticas municipais en favor da igualdade e contra as violencias machistas, con especial atención á prevención e sensibilización. Poñendo en especial relevancia as actuacións derivadas da Mesa de Coordinación Interinstitucional contra a violencia machista.
4. Instar á Xunta de Galiza a continuar incrementando os recursos económicos destinados a loitar contra a violencia de xénero, ata acadar o 1% do total do seu orzamento a políticas de igualdade.
5. Instar á Xunta de Galiza a incrementar os esforzos na prevención e na loita contra a violencia sexual, acelerando os traballos encamiñados ao cumprimento dos acordos parlamentario en materia de aprobación e aplicación dun protocolo de prevención e intervención fronte a agresións sexuais no marco do ocio nocturno e impulsando no curso 2023/2024 unha campaña específica sobre a violencia sexual e os recursos no ámbito do ensino secundario e universitario para espallar o seu coñecemento entre a poboación máis nova.
6. Demandar á Xunta de Galiza a aprobación dun programa de ampliación e extensión dos CIM a través das seguintes medidas:
 - O incremento da achega económica do programa de axudas e subvencións de apoio aos CIM co obxectivo de reforzar e ampliar a rede galega de CIM facendo especial énfase na creación destes centros naqueles concellos e comarcas nos que actualmente non existen ou están sobrecargados.
 - A contía económica máxima que a Xunta de Galiza achegará para o financiamento dos CIM a través da liña de axudas anual terá en conta a fixación de ratio mínimas de persoal que deberá establecerse en función do número de mulleres potencialmente usuarias do servizo así como a

contratación a xornada completa, como mínimo, de todo o persoal que sexa obrigatorio para a acreditación do CIM. Así mesmo, o Programa de apoio aos CIM procurará que o orzamento garanta non só o pagamento dos custes de persoal e de mantemento senón tamén o desenvolvemento de actividades e programas de prevención da violencia machista e a promoción da igualdade.

-Impulso das actuacións necesarias para que a normativa que regula os CIM amplie o personal mínimo para a acreditación dos centros para incorporar novos perfís profesionais, nomeadamente, persoal técnico en igualdade e persoal administrativo.

7. Instar ao Goberno de España a dar cumprimento efectivo do Pacto de Estado contra a violencia de xénero, impulsando as modificacións legislativas pendentes e adoptando as medidas recollidas neste pacto en materia de prevención, detección e atención integral.